



Pou Piblikasyon Imedya: 18/11/2022

GOUVÈNÈ KATHY HOCHUL

GOUVÈNÈ HOCHUL ANONSE 234 MILYON DOLA NAN ASISTANS ALIMANTÈ SIPLEMANTÈ POU MWA NOVANM LAN

Tout fwaye SNAP yo pral resevwa nivo avantaj alimantè maksimòm pou mwa novanm lan

Avantaj alimantè siplemantè yo prevwa kontinye jiska fevriye

Gouvènè Kathy Hochul te anonse jodi a ke tout Nouyòkè ki enskri nan Pwogram Asistans Nitrisyon Siplemantè (Supplemental Nutrition Assistance Program, SNAP) a ap resevwa nivo avantaj alimantè maksimòm ki otorize pou mwa novanm nan. Tout fwaye k ap patisipe nan SNAP yo — sa gen ladan sila yo ki deja nan nivo avantaj maksimòm yo — pral resevwa alokasyon siplemantè mwa sa a, sa ki pral mennen nan yon enjeksyon apeprè 234 milyon dola finansman federal nan ekonomi Eta New York la.

"SNAP se youn nan pi gwo zouti nou genyen nan abòde ensekirite alimantè nan mitan Nouyòkè yo, sitou sila yo ki toujou ap soufri akòz retoube ekonomik pandemi an te koze", **Gouvènè Hochul te deklare.** "Lajan sa yo pral ede Nouyòkè yo achte manje ki an sante ak nourisan pou tèt yo ak fanmi yo, pandan y ap libere resous pou lòt bezwen nan kay la."

Yo pral bay sipleman èd ijans lan pou tout fwaye yo, sa gen ladan sila yo ki nòmalman resevwa avantaj maksimòm ki otorize chak mwa, k ap resevwa SNAP, yon pwogram ki finanse pa gouvènman federal epi se Biwo Asistans Tanporè ak Andikape (Office of Temporary and Disability Assistance, OTDA) Eta New York ki sipèvize li. Fwaye ki deja toupres oswa nan nivo maksimòm avantaj la — 939 dola pou yon fwaye ki gen kat moun — pral resevwa yon peman siplemantè omwen 95 dola.

Fwaye SNAP nan tout konte ki andeyò Vil New York yo ta dwe wè avantaj anplis sa yo afiche nan mèkredi 23 novanm. Fwaye SNAP sa yo nan rejyon senk konte Vil New York la ta dwe wè avantaj pa yo afiche nan lendi 28 novanm.

OTDA te kòmanse bay avantaj siplemantè an ijans an avril 2020 pou fwaye SNAP sa yo ki te resevwa mwens pase kantite maksimòm avantaj chak mwa a. Lè deklarasyon ijans Eta New York la te ekspire an jen 2021 an, ajans lan te travay avèk siksè ak

gouvènman federal la pou garanti alokasyon maksimòm pou tout fwaye SNAP yo jiska ekspirasyon deklarasyon federal yon ijans sante piblik, ki te pwolonje jiska janvyè epi ki pral pèmèt OTDA pou kontinye bay avantaj sa yo jiska fevriye.

Nouyòkè yo kontinye konte anpil sou SNAP, avèk plis pase 1.6 milyon fwaye, sa gen ladan plis pase 2.8 milyon Nouyòkè, nan tout eta a ki enskri nan pwogram lan nan mwa septanm lan. Pandan ke benefisyè SNAP yo nan tout eta a te bese relativman pa rapò ak mwa out la, yo te ogmante 2.5 pousan sou mwa septanm 2021, sa ki mete aksan sou demann kontinyèl pou avantaj enpòtan sa yo.

Komisè Biwo Eta New York pou Asitans Tanporè ak pou Andikap, Daniel W. Tietz, te deklare, "Nou kontan kontinye travay ak patnè federal nou yo pou maksimize benefis chak mwa pou tout benefisyè SNAP yo nan Eta New York. Sa pral ede plizyè santèn milye Nouyòkè k ap travay di k ap lite pou mete manje sou tab la pou kenbe fanmi yo an sante ak byen nourri."

Reprezantan Joe Morelle te deklare, "Nou gen yon devwa pou asire fanmi yo kapab founi timoun epi mete manje sou tab yo. Mwen apresye efò Gouvènè Hochul ap fè pou entèwonp sik povrete a nan pwolonje avantaj ijans siplemantè SNAP bay Nouyòkè yo. Mwen pa ka tann travay kontinyèl nou ansanm pou ogmante aksè ak opsyon manje ki bon pou sante yo epi ranfòse avni kominote nou an."

SNAP jwe yon wòl enpòtan nan rekiperasyon ekonomik kontinyèl New York la epi li deja enjekte plis pase 2 milya dola nan ekonomi Eta a depi mwa janvyè. Chak dola federal ki investi pa SNAP jenere jiska 1.54 dola nan aktivite ekonomik, dapre yon [etid federal](#) ki mezire enpak SNAP sou ekonomi Etazini an.

Avantaj siplemantè sa yo tou se yon mwayen sovtaaj enpòtan pou Nouyòkè ki nan bezwen yo, pliske anviwon 14 pousan popilasyon eta a te konte sou avantaj SNAP yo ane pase, dapre [yon etid resan](#). Plis pase mwatye fwaye benefisyè se te fanmi ki gen timoun epi apeprè 48 pousan te gen yon adilt ki gen plis pase 55 ane oswa yon moun ki te andikape.

Menm jan pou mwa ki pase yo, peman yo ap fèt dirèkteman sou kont Transfè Avantaj Elektwonik (Electronic Benefit Transfer, EBT) benefisyè yo deja genyen an epi y ap kapab itilize l avèk kat EBT yo deja genyen an. Menm jan ak avantaj nòmal SNAP yo, avantaj siplemantè yo ka sèvi pou achte manje nan magazen ki vann manje an detay ki otorize yo. Tout avantaj SNAP ki pa sèvi yo ap otomatikman rapòte nan pwochen mwa k ap vini an.

Jwenn plis enfòmasyon sou avantaj siplemantè SNAP pou ka dijans yo, ansanm ak repons pou kesyon moun poze souvan yo, [isit la](#). Nouyòkè yo ki enterese enskri kapab verifye elijibilite yo pou SNAP, epitou aplike sou entènèt, lè yo ale sou mybenefits.ny.gov.

###

Lòt nouvèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418